

SESSIONI URDINARIA DI U 2021

RIUNIONI DI U 15 d'APRILI di u 2021

N° 2021 /M2/ 42

QUISTIONI URALI DIPUSITATA DA Alexia Villanova

Oghjettu : Etica publica – Bilanciu di i dispositivi messi in anda à a Cullettività

U mesu scorsu (di marzu di u 2021), ind'un numaru spiziali di a *Gazette des communes* è di u *Courrier des maires*, una « **Guida di l'etica publica** » hè stata publicata à destinazioni di i ducidori lucali, ch'elli sianu eletti o aghjenti. Issa publicazioni vinia in riposta à un cunstatu doppiu.

In prima, u cunstatu di a **piazza maiò ch'edda t'hà l'etica in a ghjestioni publica**. Oghji, à i citatini, ùn li basta più ducidori unesti chì rispittanu u dirittu à u sensu strettu ma dumandani trasparenza, prubità, è asemplarità da i so governi. Sicura chì u rispettu di sti reguli pari d'essa ditarminanti da garantiscia u statu di dirittu ma ancu par garantiscia i valori chì cunstituisceni u « campà insemi ». Accerta u pattu di fiducia trà u citatinu è i so istituzioni, pattu chì hè u fundamentu di l'azzioni publica. Di fattu, st'etica publica s'arremba nantu à un tritticu : a trasparenza, a privinzioni è a riprissioni. Di sicura, hè a rispunsabilità di i cullettività d'assicurà a trasparenza di i so attività è a privinzioni di i mancanzi à i duveri di prubità è di deuntulugia. Tandù, u sviluppu di i miccanismi di trasparenza è privinzioni à tutti i niveddi ùn deveni micca essa considerati cum'è un supsettu purtatu à nant'à tutti ma piuttosto cum'è un mezzu di rassicurà l'upinioni publica à nant'à a bona ghjestioni publica.

In siconda, sta guida rimanda à un altru cunstatu : quellu **di a complessità inerenti à sta materia**. Ghjè vera chì, à u passu di i leghji, i nuzioni di prubità è di deuntulugia ani trovu diclinazioni cuncreti è st'ultimi anni, l'oblighi regulamentari è legali si sò fatti beddi più numarosi, masimu par l'attori lucali : a leghji di l'11 d'uttrovi di u 2013 nantu à a trasparenza di a vita publica, a leghji di u 20 d'aprili di u 2016 nantu à a deuntulugia è i diritti è oblighi di i funzionarii, di sicura a leghji di u 9 di dicembri di u 2016 nantu a trasparenza, a lotta contra a curruzzioni è a mudernizaioni di a vita ecunumica detta « leghji Sapin II » o l'ultima a leghji di u 6 d'aostu

di u 2019 di trasformazioni di a funzioni publica chì dà di più rispunsabilità à i ducidori lucali i u quattru di u cuntrollu deuntologicu. Issi dispusitivi toccani i parsoni - eletti o aghjenti- (par asempiu pinsemu à a privinzioni di i cunflitti d'intaressi cù l'oblighi dichjarativi par certi, i pruceduri detti di diporta, di rinviu o l'oblighi deuntulugichi par l'aghjenti) ma issi dispusitivi toccani dinò l'uganizzazioni in a so dimensioni istituzionali (par asempiu pinsemu à a funzioni di « rifarenti deuntulugicu », o i pruceduri d'alerta etica...). Eppure, u bilanciù di i cullettività ùn hè micca sempri ottimu par a messa in anda di i dispusitivi chì cuntribuiscini à a prubità è a deuntulugia di manera generali. Di fattu, i cullettività metteni in ballu issi dispusitivi cù niveddi assai varii ; a leghji lascia d'altrondi una libartà più o menu impurtanti à l'attori.

Par ciò chì tocca à a nostra cullettività, issa esigenza di i nostri tempi presenta caratteristichi beddi particolari. Prima, nantu à u pianu puliticu postu chì aviatu fattu di sta quistioni un puntellu di u vostru mandatu intornu à u vostru mottu di « maison de cristal ». In sopraprìu, cù a Cullettività di Corsica c'era un pegnu di più par voi : a criazzioni di a cullettività unica. Ghjè vera chì fù una sfida d'aduniscia trè cullettività, quandu chì ognuna avia a so urganizzazioni sputica, a so cultura sputica è a so manera di travaddà sputica. Fù una vera sfida sapendu chì l'armunizzazioni di i prucedurii hè un travagliu, chì par essa nicissaria, hè cumplexa assai, masimu pà sta quistioni. In fini, st'esigenza t'hà un ribombu particolari in l'embiu di u cuntrastu nantu à i sviamenti maffiosi ch'edda campa a nostra isula quant'è in i riposti ch'eddu ci vularia à dalli.

Tandu, pettu à issi nicissità è issu cuntessu singulari, vuleria dumandà vi, Monsieur le Président, chì bilanciù pudeti fà di i miccanisimi chì cuntribuiscini à a prubità è à a deuntulugia in a Cullettività di Corsica ?

Appruvandu u vostru raportu (raportu 2019/E4/413), l'Assemblea di Corsica avia dicitu di purtà « cù forza u so impegnu à sviluppà una azzioni publica fundata à nant' à i valori d'etica, di deuntulugia, di trasparenza è di prubità » (dilibarazioni N° 19/451 AC). Aldilà di l'elementi dighjà missi in anda in u 2019 (cum'è a cartula di deuntulugia di a cumanda publica o l'oblighi dichjarativi di l'eletti o i furmazioni di l'eletti ... si pudaria aghjunghja ancu, pocu tempu fà, a cartula etica di u mecenatu...), u raportu pruponia **altri camini d'evuluzioni**. Certi sò stati missi in anda cum'è a cummissioni di deuntulugia (lugliu di u 2020). Chì bilanciù glubali pudeti fà di iss'evuluzioni ? À chì statu di missa in opara ni semu?

Par compia, vuleria dumandà vi dinò : esistanu o micca miccanisimi di seguita è di cuntrollu di i dispusitivi dighjà messi in anda ? postu chì s'edda hè nicissaria di sviluppà sta cultura in tutti i sferi (cù cartuli di deuntulugia è furmazioni par asempiu), in issu duminiu particolari, i mezzi di seguita è di cuntrollu sò impurtanti assai, guaranti di l'effetività è di u successu di issi misuri.

Vi ringraziu.